

## RAYMUNDUS TELLERÍA

### SACELLUM SCALENSE «S. MARIA DI MONTE»

ubi S. Alfonsus de condenda nova Congregatione secum deliberavit

Dissertatio antehac edita super primo excursu missionario Congregationis alfonsianae nascentis (1), nos suadet ut ex valle Tramontii in fere attiguum concham Scalensem regrediamur, conscensuri usque ad loci altiplanitiem montanam atque ingressuri sacellum seu parvum sanctuarium S. Mariae «di Monte», ubi S. Alfonsus peregrinus atque hospes constitit mensibus maio et iunio an. 1730 (2). Ad sacrae aedis umbram et coram B.M.V. effigie zelans missionarius, dum corporis vires laboribus apostolicis fractas reficit, merito describitur orationi instanter deditus, de opilionibus catechizandis sollicitus ac de nova congregatione missionaria instauranda secum deliberans. Iuvat proinde in medium proferre summarias archivi notitias, quae nobis hanc S. Alfonsi peregrinationem reponere quodammodo sinant intra illius aetatis cardinem historicum. Idcirco, postmissis super Scalae civitate edendis commentariis, hodiernis illuminare parumper conabimur adiuncta loci, temporis personarumque, quibus circumsessus fertur S. Alfonsus in sanctuarium ascendens tanquam advena et peregrinus.

#### I

##### PRÆNOTAMINA SUPER ADIUNCTIS SANCTUARIi TEMPORE S. ALFONSI

##### I. - *Loci adiuncta geographica et historica.*

Ex littore amalphitano viator in altum laboriose conscendens, quiescebat olim paulisper intra Scalae moenia (374-470 m. altitudinis), iisque prope ecclesiam et vicum S. Catharinae superatis, pergebat calcare clivosos montis tramites usque ad eiusdem fasti-

---

(1) Cfr *Spic. Hist.* 10 (1962) 179-217.

(2) Cfr *Spic. Hist.* 8 (1960) 427-428.

gium (1050 m.), mariano sanctuario conspicuum; unde tum circumstans naturae spectaculum, tum substans a longe speculum maris amalphitani compensabant abunde arduam ascensus defatigationem. Melius quam his immorari, ad scopum nostrum confert sublineare quam arcte geographica haec compages enutriebat ac regebat cunctam civium Scalensium activitatem: siquidem ea, quae in documentis coevis nuncupatur per excellentiam «la montagna», adest praesentia sua physica et morali plerisque municipum deliberationibus (3). Prae primis vastum territorium, pascuis silvisque locuples, comprehendebat non solum «fractiones» saluosas subiacentes et montis declivia usque ad Scalae ianuas, verum etiam altiugam planitiem, quae ex S. Maria «di Monte» protendebatur (circa 15 klm.) versus septentrionis colles, qui eminent civitati Lettere: etenim a tempore quo Amalphiae floruit respublica autonoma, haec ditionem suam ultra Scalenses montium vertices dilataverat, ut a dorso septentrionali reipublicae, nempe a littore Castri Maris (Castellammare) et a dissita Neapoli expugnationem sibi redderet impossibilem, exstructis in hunc finem castellis munitissimis intra civitatis Lettere «pertinentias» (4).

Hinc, deleta Amalphiae respublica, tanquam Medii Aevi postuma vestigia substiterunt longos annos confinium querelae, ita ut paene sub oculos S. Alfonsi aspiciamus cives Scalae et Lettere decertantes super pascuis montanis, quorum possessio in dominium incertum lapsu temporis abierat (5). Nec proinde miramur quod Scalae publici rectores acriter obstiterint marchioni «di Monterosso», qui armenta sua insciis municipibus ausus fuerat

(3) Harum deliberationum vestigia S. Alfonso coetanea decerpimus apud Acta municipii (Libro de' Parlamenti, 1711-1765), in quibus continentur edicta vel pacta super pabulatoriis iuribus, quae cedebantur suetis conditionibus, videlicet imposita lege vigilandi ne ex pascuis gerendis quid detrimenti caperent cetera montis bona communia, v.gr. (f. 129v): «Die 9 maji 1730. Si affitta il pascolo della Montagna». Item (f. 158): «Die 16 julii 1732. Erbaggio della Montagna per capre, vacche ... nelli luoghi di Cerrito e lo Chiaito».

(4) «Gli amalfitani estesero il loro dominio [saeculo IX] non solo su tutto il versante dei Monti Lattari che guarda il golfo di Salerno, ma occuparono pure il declivio che si specchia nel golfo di Napoli, impadronendosi dei borghi di Pino, di Gragnano e di Lettere, situati nel territorio dell'antica Stabia... fortificandoli in castra quasi inespugnabili... Il castello di Pino rappresentava il più sicuro baluardo di Agerola e di Amalfi, dalla parte del nord, perché proteggeva le vie di comunicazione che dalla pianura del Sarno salgono ai monti per ridiscendere alla riviera amalfitana». Fr. DE CAPUA, *Le tre chiese dei «castra» medievali di Lettere, di Gragnano e di Pino*, Napoli 1950, 7, 25.

(5) Apud S. Visitationis Regesta fit mentio litigiorum, quae inter utramque civitatem exardebant quinque annis ante S. Alfonsi peregrinationem: «Io sotto croce signato Genaro Bottone della città di Scala, avendo inteso publicar scomunica ad istanza della città di Ravello contro chi sapesse in quali parti precisamente della montagna di Cerrito fossero stati anticamente i termini della medesima per distinguera dalla montagna della città di Lettere, e li termini che presentemente si osservano in d<sup>a</sup> montagna di Ravello siano moderni... Ravello 8 gennaio 1725». Arch. della ex-Cattedrale di Ravello, Visita di Mgr. Chiarelli, Sine fol. - Praefatum folium an. 1725 adnexum fuit. S. Visitationi posteriori.

pabulari intra herbosos montium limites(6). Vigil auctoritatis localis oppositio(7), facile explicatur, quia ex pingui huius territorii foetura trahebantur potiores Scalenses industriae: lignaria scilicet, carnaria, lanaria, carbonaria, casearia, et sic porro, additis quoque fructibus vineae citreique ex hortis atque agellis, qui dispersim civitatis domos praecingebant.

Huic ergo cardini geographico innexus regyrabat index civitatis oeconomicus et socialis. Gravis aut fere extrema pauperies, interdum a biographis alfonsianis proclamata, nequit dici generalis nisi quatenus divitiarum distributio inaequaliter vigeat: idcirco conferri debet cum iuratis declarationibus pro officiali censu (*catasto*) subscriptis, in quibus acervantur et computantur privatae civium substantiae, utique quoad redditus partim imminutae, ne proprietarii vectigalibus nimis onerosis obruerentur. Ad gregariam quod spectat ovium armentorumque supputationem, pro scopo nostri articuli valde utilem, ex eadem variis centenis conflata (8)

(6) Contigit factum iisdem fere diebus, nempe mense octobri an. 1732, quibus accingebatur S. Alfonsus ad prima Congregationis suae tentoria Scalae defigenda. Etenim D. Franciscus Mezzacapo, marchio di Monterosso, insciis Scalensis municipii ductoribus, ausus erat immittere « a pascolare sopra la Montagna quaranta o cinquanta pezzi di vacche ». Succensuerunt cives Scalenses: quare eosdem precatus est marchio, ut sibi liceret quattuor aut quinque saltem dies armenta sua depascere, iusto pretio solvendo. Annuerunt Scalenses municipes « per tutta la fine del corrente ottobre », refirmata conditione ne quid inde detrimenti bono publico obveniret. - Libro de' Parlamenti i. cit., die 5 octobris 1732 (f. 153).

(7) Oppositio et vigilantia tam auctoritatis quam privatorum trahebant originem ex duplici capite: quatenus scilicet ius pabulandi vendebatur sub hasta publica et quatenus eiusmodi venditio nequibat privatos cives expoliare cunctis eorum iuribus. Ecce venditionis protocollum compendiatim relatum: « Die 23 augusti 1736. In civitate Scalarum. In nostra presenza li magnifici Dr. fisico [*id est: medicus*] D. Andrea Battimelli e D. Andrea Falcone, Eletti..., hanno affittato a D. Matteo Romano l'erbaggio delli demanij ... per pascolo di tutte sorti di animali per lo spatio d'anni quattro per prezzo di docati 200 alla ragione di docati 50 l'anno ». Licitationem publicam concluserant « ad estinto di candela » eamque adiudicare debuissent D. Francisco Oliva, qui pro singulis annis obtulerat 55 ducatus: eidem tamen antepositus est praecitatus D. Matthaes Romano sub conditione: « acciò ogni cittadino possa andare a fare erba per dentro li territori demaniali ». Arch. di Stato, Salerno, Prot. Not., pacco 4661 (an. 1735-1737), Nicola Imperato, an. 1736, f. 186. - Conditionem vero appositam ac privatorum iura proculcabant locatores: unde nascebantur publicae coram notario protestationes, quoniam « è stato sempre lecito ad ogni cittadino non solo far pascolare i loro animali [*in territorio demaniali*], ma ancora far legna nelli medesimi gratis e senza pagare cosa alcuna ». Ibid., pacco 4662 (an. 1738-1750), an. 1740, f. 137v.

(8) Arch. di Stato, Napoli, Catasto, v. 3967, Scala Atti Preliminari (an. 1739, extra foliationem scribit cancellarius Franciscus M. Verone: « Il territorio di Scala è sassoso ed inculto: non vi sono affatto bovi aratori per non esservi terreno da semina, consistendo tutto in boschi, selve, giardini e vigne: vero vi sono poche partite di capre, delle quali la maggior parte sono de' forestieri, che si tengono in affitto da nostri cittadini e pascolano nella montagna demaniale ed in altri luoghi procomunali: e le poche de' cittadini, che in vero ascendono al numero di circa 400, si tengono da padroni per conto proprio, ma affittandosi per ricavare l'annua rendita di doc. 12 il centinajo. Vi sono ancora poche partite di vacche, delle quali la maggior parte sono de' forestieri, che pascolano pochi mesi dell'anno nella montagna demaniale e pagano l'erbaggio all'affittatore di d° demanio, e l'altre de' cittadini in tutto il numero di 40 incirca... E vi sono ancora due muli e circa

eruimus pastorum manipulum, cui evangelizando providebit S. Alfonsus inter fagos castaneasque sub tegmine S. Mariae « di Monte ».

## 2. - Sanctuarii facies historica et iuridica.

Quemadmodum pro vita quotidiana alenda cogebantur cives plurimi oculos et pedes in altum convertere, ita voluerunt attollere fidei palmas versus montis cacumen, in quo erexerant sacram Deiparae aedem quasi gentium gregumque palladium: quae sane erectio defixa fuit in areola, ubi extitisse praesumitur sub imperio romano fanum insigne, cui ex Scala expediebatur ascensio per semitam insuavem, hodieque in superno tractu priscis quadratis saxis fundatam.

Ad rem nostram satius confert, praelucentibus documentis infra citandis, detegere quadamtenus pii loci statum materiale ac iuridicum decurrentibus tribus vel quattuor primis decenniis saeculi XVIII, S. Alfonsi visitatione muneratis. Aegre quidem hodierna aetate, postquam funditus abrasum fuit B.M.V. sacellum et graviter conquassatum eremitorium (9), ex his quae supersunt aedificiorum reliquiis (10) effingere ac dimetiri possumus sive ecclesiolae magnitudinem, sive eremitorii contignationes. Nihilominus in dubium non venit quod parvum templum constabat unica navi, tribus autem altaribus: horum aliud divo Nicolao sacrum et propria cappella seiunctum, maius vero piissima B.M.V. Icone affabre sculpta animos illiciens. Suo namque ligneo simulacrostabat Gei Genitrix, Mater ac Regina, spirans potentiam et dulcedinem, suaviter manu laeva Filium suum stringens peregrinisque exhibens, dextra vero tenens librum apertum (11).

Adiacebat mariano delubro eremitorium quoddam seu cappel-

---

10 somari per uso di cittadini impiegatinel trasporto delle vetuaglie dalla marina ». - « Marina » in hoc loco indicat littus inter Amalphiam et Atrani, circa 400 mts. subtus Scalam iacens: unde nascebatur quotidie necessitas subvehendi atque evehendi merces. Per transennam connotetur cancellarii Franciscii Verone calliditas, utpote qui armentorum Scalensium copiam diminuit, ut exinde pariter minuantur taxae vectigales a regiis administris edictandae.

(9) Incendium contigisse fertur an. 1800, provocatum ex fortuito casu a quodam silvae custode. Cfr L. MANSI, *Cenni storici della città di Scala*, Salerno 1912, 26.

(10) Abhinc plures annos ad locum conscendimus oculisque cuncta perpendimus. Ex sanctuario non nisi quaedam fundamenta discrevimus ac terrae saxorumque aggerem. Stabat domus parva, cuius pars inferior praebibat aulam (hodie stabulum), superior autem numerabat tria quatuorve habitacula.

(11) Simulacrum B.M.V., postquam solo aequatum fuit sanctuarium, invenit refugium et cultum in ecclesia cathedrali Scalensi; nuperrime autem transmissum fuit custodiendum filiis S. Alfonsi Scalae commorantibus, qui illud publicae venerationi exposuerunt in altari maiori ecclesiolae, adiacentis domui nostrae Congregationis.

lani hospitium, cuius haud spernenda moles hodieque in loco aestimatur ex parietinis sive ruderationibus, quae noctu diuque perfugium praestant pecorariis ac venatoribus oberrantibus. Sacellum circumibat area sat ampla, herbida potius quam arboribus consita ac demum seminaria ab anno 1732, quo municipii «electi» seu ductores annuerunt ut cappellano fas esset colere circumstantes agellos ad fruges carpendas necessarios: quibus nutritus et redditibus cappellaniae nunquam pinguefactus cogebatur in edito loco, temperie hiemali etiam rigente, subiacere privationibus omnigenis, prae ceteris anachoreticae vivendi solitudini.

Cappellaniae iuridica fultura nitebatur lege patronatus, quo fruebatur familia Sorrentino, olim inter Scalenses clarissima. Cuius patronatus historicam originem retrotrahunt documenta nobis cognita saltem ad medium saeculum XVII. Enimvero post annum 1650 comparat D. Scipio Sorrentino, «Rationale» seu computator Regiae Camerae Summariae Neapoli, sed natalibus suis nobilis Scalensis, qui pro sua in Dei Genitricem devotione fundavit cappellaniam perpetuam, etsi laicalem, in beneficium sanctuarii. Laicalem dicimus propterea quod ipsi patrono eiusque successoribus inerat ius nominandi atque ad nutum amovendi cappellanum beneficiarium, reservata loci Ordinario facultate dumtaxat immitendi sacerdotem in possessionem sui beneficii. Officium porro secum ferebat onera commorandi diu noctuque prope sanctuarium ac celebrandi quattuor in hebdomada missas ad fundatoris intentionem (*Doc. I*).

Vita functo versus an. 1675 D. Scipione Sorrentino (12), patronum egit eius filius D. Franciscus Sorrentino, cui primis saeculi XVIII decenniis suffectum fuit tertium familiae directum virgultum D. Philippus Sorrentino. Haec sane periodus magni nostra interest, utpote quae immediate praecedit aut comitatur S. Alfonsi peregrinationem ac subsequentem illius apud Scalenses commorationem.

Intus sanctuarium fundata vigeat alia cappellania sub titulo

---

(12) D. Scipionis Sorrentino eiusque filii Francisci mentionem facit in suo testamento D. Michaël Angelus Sorrentino, primicerius cathedralis Scalensis et valde probabiliter familiae consanguineus: «Dichiaro come l'anni passati, tre anni dopo che fù morto il qm. Sig. Rationale della Regia Camera della Summaria Scipione Sorrentino, andai a Napoli ... ed essendo andato in casa del Sig. D. Francesco Sorrentino, figlio del dº qm. Rationale...». Arch. di Stato, Salerno, Prot. Not., pacco 6697, Stefano Verone, an. 1681-1682, f. 38, Super D. Scipione Sorrentino nihil inter notarios Scalenses invenimus ab anno 1650 ad an. 1682. Ceteroquin familiae Sorrentino adiudicatur Scalae cappella S. Mariae Constantinopolis sive «de Surrentinis» fundata a qm. Anna Surrentino an. 1588. Arch. della ex-Curia, Sacre Visite, f. 8v (1694: per Ill.mum Aloysium Capuano). - Ibid., sine fol., 1710: per Ill.mum Perrimezzi.

S. Nicolai, de qua nihil scimus nisi quod an. 1753 gerebatur ratione patrimonii a Rev.do D. Salvatore della Mura et onerabatur obligatione celebrandi 36 missas cum stipendio unius « carlini » pro singulis diebus (*Doc. IV*).

### 3. - *Cappellanorum elenchus.*

Cappellanorum B.M.V. elenchum, etsi lacunosum, comprobamus fuisse saepe saepius renovatum. Hoc sane mirabitur nemo qui praenoverit huius ecclesiastici beneficii condiciones oeconomicas et iuridicas hucusque a nobis insinuat: ex quibus fluit ex una parte quam arcte beneficiarius ligabatur placitis familiae Sorrentino, ex alia autem quanto pondere eremus incommodus et solitarius gravabat sacerdotum vires físicas et morales. Facile ergo deprehenditur cur, S. Alfonso in sanctuarium adveniente, comperit ille locum cappellano orbem et servitiis spiritualibus destitutum.

Primo itaque decimi octavi saeculi anno inserviebat ecclesiae cappellanus Rev.dus D. Scipio Pizzofferro, cui ob valetudinem imbecillioem substitutus fuit an. 1708 Rev.dus D. Laurentius Nastaro, saltem cognomine inter Scalenses eximius (13). Haud minus clariore familia Scalensi et Ravellensi promicat deinde alius cappellanus, Rev.dus D. Caietanus Mansi, qui aetate atque infirmitatibus similiter compeditus cessit an. 1726 munus suum Rev.do D. Carmino Sanmarco, sacerdoti Ravellensi (*Doc. II*).

Is ergo beneficiarius Sanmarco, quo tempore S. Alfonsus an. 1730 adiit aedem sacram, huius regimen iuridicum adhuc tenuisse videtur, etsi de facto praesumitur maluisse diutinam a servitio desertionem. Absentia quidem minus decora, quia illius culpa sanctuario illata fuerant damna tam ex incendio orta quam ex amissa suppellectili obvenientia: de quibus ipse accusatus et reparationem pollicitus sese verbis poenituit, sed operibus alienum se dixit quatenus ex districtu Scalensi discedens aufugit extra dioecesim: unde an. 1737 in ius vocatur coram Ravellensi curia atque ab ea sequestro bonorum plectitur (*Doc. III*).

Interea S. Alfonsus non modo in sanctuarium pervenit, sed apud ipsum mansit circumfusus eventibus externis atque internis, qui ex parte nostra requirunt ampliorem dilucidationem.

---

(13) In praecitato archivo ex-Curiae, Sacre Visite, f. 13: Cappella SS.mi Salvatoris: de Nastaris (in cathedrali ecclesia). - Item: Arch. di S. Lorenzo (ex-Cattedrale), Liber Conclusionum, 1719-1748, f. 11, 5 jan. 1727: « Al R.mo Capitolo siano pervenuti ducati 56 ... ad impiegarsi col R.do Sig. can.co D. Lorenzo e D. Andrea Nastaro, fratelli... ».

## II

S. ALFONSUS AN. 1730 AD SANCTUARIUM PEREGRINUS OBIT  
IN EO MINISTERIA APOSTOLICA*Praenotamen documentarium.*

Peregrinatio S. Alfonsi ad sanctuarium S. Mariae « di Monte » atque illius ibidem commoratio ultra mensem protracta ratae habentur historice ex duplici potissimum fonte, quorum prior resedit in adnotationibus manuscriptis P. is Sportelli, alter autem profluxit ex biographia P. is Tannoia. Idcirco congruum ducimus utriusque textum praemittere, ut tempestive dignoscantur ac rectius pensentur rerum personarumque adiuncta. Etenim P. Caesar Sportelli († 1750), a mense aprili an. 1733 Scalae habitator, colligere valuit recentes factorum memorias et per se ipse coram inspicere sanctuarii eremitoriique circuitum. E converso P. Tannoia, festinus ac serus Scalae hospes (14), nobis mandavit longiorem eventuum narrationem ex colloquio cum priscis Patribus desumptam. Utrumque textum, etsi aliunde notum, praelegere iuvat ad fricandam eventuum memoriam. Scribit namque P. Sportelli :

P.D. Alfonso con alcuni suoi compagni [*in margine*: 1730], tra quali D. Giovanni Mazzini, D. Mannaarini &c, per alcuni giorni volle andare a qualche luogo solitario &c. Fu scielto S. Nicola di Munuri [*Minori*] &c. Ma giunti in Amalfi, dal Vicario D. Angelo Criscuoli furono persuasi di portarsi in S. Maria de' Monte (15), come luoco egualmente solitario, più comodo, e che nel medesimo si potea dar aggiunto a caprari &c.

Con tale occasione fu invitato a fare una predica del SS.mo Sacramento, al Vescovado di Scala, e perché disegnava l'Altissimo &c, piacque: onde fu invitato per il seguente 7bre a fare gli esercizi nella solita ivi novena della Croce &c (16). E con tal congiuntura diede ancora gli esercizi a quel nuovo Monastero &c. Del quale informato e restato molto compiaciuto, tuttavia dicendo tal'una di quelle religiose, egli mai avesse abbracciato tale Istituto, quante... [*lacuna*] (17).

(14) [A. TANNOIA], *Della Vita ed Istituto del Ven. Alfonso M. Liguori*, I, Napoli 1798, 97. « Curioso vollen portarmi nella città di Scala per osservare di persona questa pomposa abitazione », id est, domum Anastasii.

(15) « Dei monti » est forma vulgata quoque a P. Tannoia; nihilominus documenta publica utuntur forma singulari « di Monte ». Formula « de Monte » seu « ad Montem » occurrit similiter in casali nucerino, dicto Casolla, v.gr.: « Emptio pro cappella S. Mariae ad Montem. Die 27 septembris 1751 ». *Arch. di Stato, Salerno, Prot. Not., Ioannes B<sup>o</sup> Scafati*, an. 1751, f. 785. - Item.: an. 1750, f. 5: « Cappella et Confraternitas S. Mariae de Monte, casalis Casollae ».

(16) Agitur de novendiali annuo in honorem Crucis, id est, devotissimi et antiquissimi Crucifixi, fidelium venerationi expositi in crypta cathedralis Scalensis.

(17) Cfr *Spic. Hist.* 5 (1957) 234. - Item: *Analecta CSSR* 3(1924) 217.

Ex parte sua P. Tannoia an. 1798 traditionem viventem densat hisce verbis :

Non pervenne Alfonso in Napoli, dopo la campagna fatta in provincia di Lecce e di Bari, che molto consumato. I compagni che più l'amavano... pensarono per ristorarlo, cavarlo fuori di Napoli e farlo sollevare in qualche amena campagna. Varie pensate si fecero, che non si stimarono convenienti; ma avendo proposto D. Giuseppe Panza, gentiluomo e sacerdote della città di Amalfi, un romitaggio troppo ameno in vicinanza di questa città, perché sopra un colle ed in faccia al mare, piacque a tutti il progetto: e furono di comitiva con Alfonso D. Giuseppe Jorio, D. Giovanni Mazzini, il Panza ed altri che s'ignorano .

Il viaggio per mare non si ebbe troppo prospero. Invece di tirarsi ad Amalfi, a stento si approdò a Minori. Essendosi ristorati, bonacciato il mare, si portarono ad Amalfi. Mentre ivi stavano complimentando Monsignor Scorza, che n'era arcivescovo, giunge in tempo il canonico D. Matteo Criscuoli, Vicario di Scala. Usciti in discorso del motivo del loro viaggio, *perché*, disse il Criscuoli, *non venivene a S. Maria de' Monti sopra Scala? Ivi vi è un romitaggio con sufficiente abitazione: potreste sollevarvi ed anche far del bene a tanti poveri caprai, che vi dimorano e vivono abbandonati; ed io, soggiunse, vi do ogni mia facoltà e giurisdizione.* Non dispicque il partito. Maggiormente piacque ad Alfonso per l'occasione, che se li presentava, di poter far del bene a que' poveri campagnuoli.

Avvalendosi Alfonso in S. Maria de' Monti delle finezze e facoltà ricevute dal Vicario Criscuolo, non mancò situarvi il SS. Sacramento. Quivi nell'atto che dava sollievo al corpo, ricreavasi nello spirito colla presenza di Gesù Sacramentato. Fattosi noto il loro arrivo, si videro subito accerchiati i missionari da pastori e caprai e da altra gente che dispersa stava per quelle campagne. Non è credibile quanto questo concorso fosse di consolazione ad Alfonso. Così egli che i suoi compagni si posero a catechizzare questi contadini, ed a ricevere con tutta carità le confessioni. Dandosi quei pastori l'uno l'altro la voce, vi concorse altra gente: e riuscì la villeggiatura per i missionari una continuata, ma fruttuosa missione.

Fu questa l'occasione, e così Iddio fece conoscere ad Alfonso il gran bisogno spirituale, che si offre dalle tante anime che prive de' sacramenti e della divina parola, abbandonati marciscono per le campagne e paesetti rurali. Raccontava ei medesimo che buona parte di quei contadini vivevano all'intutto dimentichi di Dio: e quello ch'è più, perché lontani da' paesi, ignoranti ancora delle cose più necessarie: anzi tanti e tanti non si potevano abilitare alla confessione, se prima non s'istruivano e dirozzavano ne' primi rudimenti della fede (18).

Praegustata porro utraque relatione, restat in meliorem lucem advehere personas et facta, sepositis quoque nonnullis mendis narrationi tannoianae commixtis.

(18) A. TANNOIA, 1. cit., 61-62.



I. - *Excursionis fautor* : *Rev.dus D. Iosephus Panza.*

Marginales errores, qui in relatione tannoiana subreptitant, ex eo proveniunt quod ipse eiusque primi informatores (19) retrogressi sunt usque ad annum 1732, post labores apostolicos in provincia Lecce et Bari, infirmitatem quam S. Alfonsus anteceperat circa festum Paschatis an. 1730, absoluto missionum certamine de quo alias diximus (20). Prope haec igitur solemnias paschalia an. 1730, dum viribus languens fit obvius amicis, unus ex his Rev.dus D. Iosephus Panza amalphitanus eidem proposuit tanquam efficax remedium interquiescere apud solitarium S. Nicolai eremitorium supra Minori colles amoenos, undis maris lambitos. Cunctis biographis alfonsianis haud acceptus fuit in minimis circumstantiis iste Rev.di Panza interventus: stat nihilominus quoad factorum substantiam, sive ob P.is Tannoia nomen, sive ex fundata eventuum connexionem (21).

Familia Panza seu Pansa, cuius claram stirpem innuit P. Tannoia, primo illius aevi decennio sibi acquisiverat in cathedrali amalphitana cappellam Immaculatae B.M.V. Conceptionis iure patronatus regendam (22) et praefato D. Iosepho Panza mox committendam. Equidem ad huius beneficii familiaris onera suscipienda vocatus est, etsi iam titulo patrimonii an. 1720 donatus (23),

(19) Testes in processibus beatificationis adducti loquuntur parum diversimode pro cuiusque informatione circa eventus distantes intervallo 60 annorum. Cfr *Nucerina ... Summarium super virtutibus*, Romae 1806, 98-128. Non sibi constat P. Tannoia, qui in processu ordinario S. Agathae (III, f. 1060) recte adiudicat peregrinationem anno 1730, sed mox deceptus ipsam postponit excursioni missionariae a S. Alfonso peractae in dioecesi Neritonensi (Nardò) atque in Apulia an. 1731-1732.

(20) Cfr *Spic. Hist.* 8 (1960) 431-432.

(21) In praecitato processu ordinario S. Agathae S. Alfonsus eiusque socii (D. Iosephus Iorio, D. Iosephus Porpora, D. Ioannes Mazzini), commoraturi in eremitorio S. Nicolai supra oppidum Minori, obvium sibi habent Amalphiae D. Iosephum Panza. Hanc suam declarationem P. Tannoia paulisper aptavit in biographia posteriore, quin pectine definitivo solveret cunctos nodos. Testificatur autem P. Mazzini se cum amicis DD. Iosepho Porpora et Iosepho Panza prima vice vidisse S. Alfonsum adhuc saecularem in ecclesia neapolitana « dei Girolamini », id est, Oratorii S. Philippi Nerii. Cfr Proc. Ord. Nuc., I, 30rv.

(22) « La seconda cappella all'entrate per la porta che conduce alla cappella del Ven. Sacramento ed avervi in essa fatto erigere altare e colonne, capitelli, paliotto et altri ornamenti di marmo e l'immagine dell'Immacolata Concezione della B.V. et anche la sepoltura ». Arch. di Stato, Salerno, Prot. Not., pacco 6721, Domenico Verone, an. 1707-1708, f. 154. - Fundator fuit « magnificus » D. Andreas Panza, cuius codicillum die 20 aprilis an. 1712 memorat suum filium Rev.dum D. Antonium et suum fratrem D. Caietanum. Ibid., pacco 6723, an. 1712-1713, f. 117v.

(23) « Donatio pro R.do Subdiacono Ioseph Panza ac Ven. Capp<sup>a</sup> SS.ae Conceptionis intus cathedralem Amalphitanam. Die 2 ian. 1721. Constitutus mag. cus D. Hieronymus Panza civitatis Amalphiae ... Detto R.do sudd<sup>o</sup> Giosepepe suo figlio sia tenuto dal di che sarà ascaso al sacerdozio e durante sua vita, non solo a celebrare la messa in tutte le domeniche e feste di qualsivoglia settimana, ma anche in tutti li giorni di quaresima ... dentro la metropolitana chiesa di S. Andrea apostolo, e proprio nella cappella della SS.ma Conce-

subdiaconus D. Iosephus, qui simul cum ecclesiasticis studiis disciplinas iuridicas excolebat: has ad tempus deposuit, ut edenda assumeret patris sui D. Francisci manuscripta historica, nempe duo volumina postuma: *Istoria di Amalfi* (Napoli 1724) (24), in quibus, praeter notitias respicientes Amalphiam, Scalam et Ravello (25), subduntur recentissimae de monasterio SS. Conceptionis an. 1720 Scalae inaugurato (26).

Illius amicitia cum S. Alfonso repetenda fortasse erit ex communi tribunalium frequentia vel, si fidem P. i Tannoia adstruimus, ex utriusque coeva adscriptione Missionibus Apostolicis (27). Quin etiam: teste eodem biographo, amicitiae ligamina sese ultra strinxerunt et D. Iosephum adduxerunt ut postmodum Instituto alfonsiano adhaereret: adhaesio quidem fuit in votis necnon occasionalis in missionibus cooperatio, sed de facto evanuit illius adscriptio nascenti Congregationi (28). Ceteroquin Rev. dus D. Iosephus Panza cum Scalae civitate reperitur devinctus a publico censu (*catasto*), ubi mox enumeratur inter alienigenas (*forestieri*) bonorum possessores (29). Ad haec, post plures annos occurrit ipse nobis sacerdos et doctor intra dioecesim amalphantanam, tanquam parochus oppidi Pianillo in edita planitie cui nomen Agerola (30), interea a S. Alfonso missionario exulta.

zione di sua famiglia de' Panza, costrutta dentro detta metropolitana chiesa de iure patronatus della sua casa ». Ibid., pacco 6727, Domenico Verone, an. 1721, f. 1. - Praeterea ibidem: pacco 6726, an. 1720, f. 218v: « Donatio ad titulum patrimonij clerico Joseph Panza ».

(24) Fr. PANSA, *Istoria di Amalfi*, Napoli 1724. Benedicto XIII dicatur opus, in cuius praefatione asserit D. Salvator Caputo quod D. Ios. Panza « geloso non meno dell'onore proprio che della fama e gloria del defunto zio, tralasciando per qualche spazio di tempo lo studio delle leggi ch'egli professava, ha atteso seriamente a raccogliere questa e altre opere dell'autore ».

(25) Curiosum est adsertum (II, p. 59): « Ravello e Scala sono così contigue che si per terra come per mare una sola rassembrano: di modo che per le finestre chiamar si sogliono da un paese all'altro... ».

(26) « In quo monasterio ad praesens sancte et religiose vivunt 22 moniales cum singulari observantia et admirabili praestantia morum » (II, 73).

(27) A. TANNIOIA, l. cit., 7: « Non mancò seguirlo D. Giuseppe Panza, gentiluomo della città di Amalfi e fratello con Alfonso della medesima congregazione delle Apostoliche Missioni ». Fatemur nobis effugisse nomen D. Iosephi Panza inter sodales Missionum Apostolicarum, dum lenta manu pervolvimus illius regesta. Cfr *Spic Hist.* 8 (1960) 393-452.

(28) Primis an. 1735 mensibus S. Alfonsus et Rev. mus Falcoia ad invicem per epistolas egerunt de Rev. di D. Iosephi Panza vocatione. Cfr *Anacleto* 12 (1933) 103, 104, 108. Concludebat die 25 martii Rev. mus Falcoia: « In D. Giuseppe Panza non vi fò gran fondamento: ma pure bramo saperne qualche cosa ». Post aliquos menses D. Iosephus Panza Scalam advenit concionaturus in oppidulo Minuto intra novendiale SS. Assumptionis et cum amicis ascensurus in sanctuarium S. Mariae di Monte ». Cfr *Epistolae Ven. Caesaris Sportelli*, Roma 1937, 20, 21, 22.

(29) Arch. di Stato, Napoli, *Catasto*, v. 3967, I, Scala. Atti preliminari (an. 1739), Sine fol.: « Forastieri possessori: R. D. Giuseppe Panza ».

(30) « Die 2 februarii 1748. In palatio Curiae archiepiscopalis Amalphiae. Constituti...

2. - *Alter excursionis stimulator* : Rev. dus D. Angelus Criscuolo.

PP. Sportelli et Tannoia concordant in eo quod, iuxta utriusque relationem, Vicarius Generalis Scalensis cognomine Criscuolo stimulos peregrinantibus addidit ut, potius quam secessum S. Nicolai supra oppidum Minori, deligerent eremitorium S. Mariae «di Monte» ad rusticandum seu melius ad silvescendum, quoniam inter reconditos saltus montium Cerriti seu Cerreto (m. 1316) et Cervigliani (m. 1203) dies feriatos egissent. Discrepant vero quoad Vicarii nomen baptismi; siquidem ipsum nuncupat D. Angelum Criscuoli P. Sportelli, e converso P. Tannoia compellat D. Matthaeum Criscuoli : unde olim credidimus (31) Vicarium in se cumulasse utrumque baptismi patronum : Matthaeum Angelum. Documenta vero hodie melius perspecta animum inclinant non modo ad duos Vicarios cognomine Criscuolo discernendos, sed ad priorem D. Angelum afferendum tanquam patrum alterius D. Matthaei : hunc dumtaxat novit P. Tannoia, qui eius nomen baptismi adiudicavit D. Angelo.

D. Angelus Criscuoli iam anno 1718 comparet aetate maturus inter collegas Capituli Scalensis. Etenim accedente novo antistite Rev.mo Nicolao Guerriero ad sacram ecclesiae cathedralis visitationem, ipsi praestant obedientiam 12 canonici, quos inter micat D. Angelus titulo poenitentiarum (32) : titulum quidem possidebat ante annum 1710, in quo a Rev.mo D. Iosepho M. Perrimezzi creatus erat Provicarius Generalis ecclesiae Scalensis (33). Attamen Rev.mus D. Nicolaus Guerriero, Ravelli semper commorans, renuisse videtur electioni aut confirmationi Vicarii Generalis pro ecclesia Scalensi : quamobrem an. 1721 DD. Iosephus et Didacus de Sasso «de regimine civitatis Salarum» (34) instituerunt re-

---

il M.to R.do D.re Sig. D. Giuseppe Panza, Parroco Rettore della Ven. Chiesa Parr.le di S. Maria della Manda del casale di Pianillo d'Agerola ». Arch. di Stato, Salerno, pacco 299, Stefano Vinaccia, an. 1748, f. 12. - Plures abhinc annos accessimus ad « casale » Pianillo, at non valuimus perscrutari archivum ecclesiae clausae illa hora nostrae visitationis.

(31) R. TELLERÍA, *San Alfonso Maria de Ligorio*, I, Madrid 1950, 146.

(32) Arch. Parr. S. Lorenzo (ex-Cattedrale), Sacra Visita, Guerriero, 1718-1719, f. 2-3.

(33) « Frater Ioseph Maria Perrimezzi ... Dilecto nobis in Christo adm. Rev. D. Angelo Criscuolo, canonico poenitentiarum ... Te in eadem ecclesia nostra Schalensi nostrum Provicarium et officialem in spiritualibus et temporalibus Generalem creamus, facimus, constituimus et deputamus ... Datum Ravelli ex nostro Episcopo hac die 27 februarii 1710 ». Arch. di Curia, Amalfi, Schalen, Acta civilia et criminalia, v. 17. Sine fol.

(34) Arch. di Stato, Salerno, Prot. Not., pacco 6727, Domenico Verone, an. 1721, f. 335, die 11 decembris. Fit historia controversiae ac sublineatur quomodo loci Ordinarius qua episcopus Scalensis erat suffraganeus archiepiscopi amalphantani, qua episcopus Ravellensis subiciebatur directe S. Sedi. Inter utramque sedem rivalitas Praesulem constringebat ut, placitis civium obsecundans, sese Scalae diceret episcopum Scalensem et Ravellensem, Ravelli autem episcopum Ravellensem et Scalensem.

cursum coram S. Congregatione Concilii, allegantes quod in decreto unionis dioecesium Scalae et Ravelli impositum erat episcopo utramque regere, praestituto suo cuique Vicario Generali: consequenter eodem anno 1721 nominati sunt pleno iure Vicarii Generales Rev.dus D. Angelus Criscuolo pro Scalensi, Rev.dus D. Angelus Pantaleo pro Ravellensi ecclesia.

Hunc rerum statum nobis describit post triennium, simul cum elogio Vicarii Scalensis, D. Iosephus Panza in praecitata *Istoria di Amalfi* (II, 74): «Iste Episcopus [Rev.mus D. Nicolaus Guerriero], cum sit praesul non tantum Ravelli quam etiam Scalensis ecclesiae, binos habet Vicarios... Primus vocatur Angelus Pantaleo a Pomarico... [Alter] Dominus Angelus vetustissimae et clarissimae familiae de Criscuolo civitatis Scalae, Vicarius Generalis eiusdem civitatis, vir apprime doctus et moribus praeditus, erga pauperes liberalis, doctrina et prudentia maxime fulget hoc honore, in sedandis et reconciliandis perturbatis animis efficacior est». Liqueat proinde quo auctoritatis titulo delegavit S. Alfonso eiusque sociis facultatem utendi sanctuario B.M.V. «di Monte» atque administrandi apud ipsum Ecclesiae sacramenta in beneficium pastorum aliorumque eo advenientium.

Convivebant (35) cum D. Angelo eius fratres D. Antonius et D. Vincentius doctor physicus, id est, medicus, cuius filius D. Matthaeus aemulatus est patris sui D. Angeli servitia dioecesi Scalensi reddita. Etenim die 16 iulii an. 1737 subdiaconus et doctor D. Matthaeus Criscuolo inter hebdomadarios ecclesiae cathedralis recipitur (36). Postmodum in civitatem haud dissitam Castri Maris (Castellammare di Stabia) migravit, fautore eiusdem loci episcopo Rev.mo D. Thoma Falcoia, a quo delectus fuit Vicarius Generalis et an. 1743 unus ex testibus ultimae suae voluntatis (37). Post obitum episcopi Stabiensis D. Matthaeus Criscuolo rediisse videtur Scalam, ubi saltem an. 1757-1758 instrumenta notarilia perficit tanquam ecclesiae cathedralis canonicus theologus (38) ac,

(35) «Die 27 novembris 1757 in civitate Salarum. Costituito D. Antonio Criscuolo ... ha asserito in presenza del Sig. D. Matteo Criscuolo suo nipote ex fratre penitenziere D. Angelo Criscuolo e Dr. fisico D. Vincenzo Criscuolo suoi fratelli...». Arch. di Stato, Salerno, Prot. Not., pacco 317, Francesco M. Cimino, an. 1758, f. 386v: «Die 5 sept. 1758... Costituito il R.do Sig. D. Matteo Criscuolo, can° teologo della città di Scala, e li M.ti R.di Sig. D. Nicola e D. Siggismondo Criscuolo, sacerdoti secolari di Scala...».

(36) «Die 16 iulii 1737 ... L'arcidiacono D. Emmanuele d'Afflitto propose come il suddiacono Dottor Sig. D. Matteo Criscuolo ... [si dovesse] ammetterlo fra gli ebdomadarii». Arch. Parr. di S. Lorenzo (ex-Cattedrale), Liber conclusionum, 1719-1804, f. 29v.

(37) Testamentum Rev.mi Falcoiae edidimus in *Analecta* 29 (1957) 109-115. Primus testis occurrit Rev.dus D. Nicolaus Criscuolo scalensis, tertius Rev.dus D. Matthaeus Criscuolo Vicarius Generalis.

(38) Vide supra, nota 35.

post aliud vicennium, die 10 iunii an. 1778 factus fuit Vicarius Capitularis ob translationem Rev.mi Michaëlis Tafuri dioecesi Cavensi (39).

Sed redeamus paulisper ad colloquium an. 1730 consertum Amalphiae inter S. Alfonsum eiusque socios et Rev.dum D. Angelum Criscuolo, qui ad illos proximavit dum venerationis obsequia ipsi exhibebant Rev.mo Petro Augustino Scorza, amalphitano archiepiscopo. Nomen huius Praesulis adducit P. Tannoia, ratus bona fide S. Alfonsi iter retardandum esse usque ad annum 1732: si vero — prout in hoc articulo sustinemus — anticipatur ad annum 1730, eo ipso excludendus erit tanquam colloquitor Rev.mus Scorza, qui ex sua Aprutinia (Teramo) sede translatus est in amalphanam mense aprili an. 1731 post obitum Rev.mi Michaëlis Bologna, mense februario eiusdem Amalphiae persignatum (40). Quapropter cum Rev.mo Bologna sermocinatos fuisse peregrinos nostros iure praesumimus.

### 3. - *Peregrinationis socii.*

Primo obtutu ex supra citatis textibus erueres PP. Sportelli et Tannoia funditus discrepasse circa numerum atque identitatem comitum peregrinantium cum S. Alfonso versum eremum S. Mariae «di Monte»; re autem ipsa mutuo se complent. In comperto sane manet P.em Sportelli, secus ac intellexerunt nonnulli biographi alfonsiani (41), minime locutum fuisse exclusivo sensu, quandoquidem expresse subintelligit alios («ceteros» ait ipse) socios, quos proprio cuiusque nomine designavit P. Tannoia, fretus seris traditionis testimoniis, etsi adhuc anceps haesit quoad unum alterumve itinerantem.

Praeter D. Iosephum Panza excursionis fautorem, indubius eiusdem particeps unanimi voce profertur Rev.dus D. Ioannes Mazzini, recens presbyter profundo fervore donatus, qui pridem S. Alfonsum causidicum admiratione prosequabatur eique iam sacerdoti fraterna amicitia adhaeserat. Cedebat quidem inter illos discrimen sodalitiis ecclesiastici, sub cuius vexillo separatim unusquisque laborabat, S. Alfonsus adscriptus Missionibus Apostolicis, Mazzini autem Congregationi ignatianae P.is Pavone; sed nullum

(39) Liber conclusionum, l. cit., f. 107v. Die 10 iunii 1778. Pro electione Vicarii Capitularis ... ob translationem R.mi Michaëlis Tafuri in civitatem Cavae.

(40) Cfr *Spic. Hist.* 8 (1960) 427, nota 43.

(41) Cfr C. DILSKRON, *Leben des hl. Alfonsus Maria de Liguori*, Regensburg 1887, 57; A. PICHLER, *Der hl. Alfons von Liguori*, Regensburg, 1922, 111. - Prior memorat Mazzini et Mannarini, alter adiungit D. Iosephum Panza.

inde manabat impedimentum ad communem utriusque cooperationem in virtutum exercitio fovendo atque in provehendis apostolatus negotiis. Participatio insuper P. is Mazzini in peregrinatione suadetur etiam ex illius subsequenti necessitudine, saltem ante mensem octobrem ipsius anni 1730, cum monasterio Scalensi Visitationis (42) : unde coniectare licet praecedentes ad asceterium aditiones ab eo peractas.

Peregrinator alter a P. Sportelli, minime a P. Tannoia, enumeratur Rev. dus D. Vincentius Mannarini, de quo iam pridem scripsimus (43) : morabatur is in neapolitano collegio « Sinensium » seu Sacrae Familiae tanquam huius Congregationis membrum : aliter ergo ac S. Alfonsus, qui a mense iunio an. 1729 apud ipsum collegium hospitabatur simplici gradu convictoris. Sponte proinde fluit ex cohabitatione familiari consortium utriusque in adparando et perficiendo excursu Scalensi, ex quo post biennium plasmata fuit vocatio D. Vincentii Mannarini in novam S. Alfonsi Congregationem missionariam.

Super aliis excursionis membris perstant in incerto nebulae. Vere quidem in elencho P. is Tannoia tenet primum locum Rev. dus D. Iosephus Iorio, insignis missionarius et arcta consuetudine S. Alfonso ligatus (44), quanquam sodalitio P. is Pavone incorporatus. Nondum tamen prorsus absolvimus enucleandum vitae curriculum huius missionarii, quem opus est accurate distinguere a Rev. do D. Francisco Iorio, probabiliter D. Iosephi patruo atque adscito Missionibus Apostolicis, uti in priore articulo descripsimus (45). Huic D. Francisco, experientia ac meritis grandaevo, alludit S. Alfonsus in suo primo *Libello Spirituali* manuscripto quoties recenset consultationes « cum Iorio » habitas inter huius periodi anxietates spirituales. Ex opposito D. Iosephus Iorio, futurus S. Alfonsi cooperator in multiformi activitate, annis quoque erat illi propemodum coaevus ideoque nihil repugnat praesentia sua inter peregrinantes.

Utcumque demum fuerit rusticantium manipulus, quaternarius nempe vel quinarius (46), nequibat proprio Marte angustas eremitorii cellas multiplicare aut dilatare, praetermisso cuiusvis famuli servitio nullibi memorato : nec pariter aliunde constat uni-

(42) *Lettere di S. A.*, I, 5. Absolute loquendo explicari potest haec P. is Mazzini cum monasterio necessitudo ex visitatione, quam ipse peregit mense septembri una cum S. Alfonso ac de qua testatur in processu beatificationis. Proc. Ord. Nuc., I, 312.

(43) *Spic. Hist.* 10 (1962) 184, 194, 196, 212-214.

(44) *Ibid.* 411, 414, 417-419.

(45) In processu ordinario S. Agathae (III, 1060) P. Tannoia adfert quintum socium Rev. dum D. Iosephum Porpora : hunc, id temporis 30 annos natum, praecognovimus in Missionibus Apostolicis militantem (*Spic. Hist.* 8[1960] 422, nota 33) ac proinde S. Alfonsovalde affinem.

versos ac singulos feriarum participes procrastinasse reditum usque ad postremos dies.

#### 4. - *Excursionis fructus potiores.*

Primigenium feriarum scopum collineabant peregrinantes, ut suas quisque — ac potissimum S. Alfonsus — corporis mentisque vires reficeret. Iure merito tantum beneficium sibi pollicebantur. Ex quo enim pedibus iugum mentis contriverunt exultantes, ipsis circumquaque patuit splendidum naturae linteum sursum deorsum amoenissimum: sursum quidem ultra silvosam planitiem, custoditam gemino supra memorato vertice Cerriti et Cervigliani: deorsum autem, praesertim ex podio dicto « Punta di Mostra Cupa », ob magnificum spectaculum substantis sinus amalphitani ac longinqui salernitani, quorum littora oppidis, pagis castellisque conspersa plurimum solem vernis radiis refringebant. Ad haec, per sanctuarii circuitum, undique silentium et pacifera menti solitudo: intra sanctuarium vero, latens SS. Sacramenti magnes ac B.V.M. dulcissima praesentia.

Dum corporali atque spirituali otio sereni interquiescunt S. Alfonsus eiusque amici, contueri coeperunt ad se properantes rudes pastores: primos sane pavidos nec loquela praestantes, ceteros autem in diem fidentiores. Exarsit ergo in sacerdotibus zelus animarum ac nulla interposita mora sese accinxerunt ad illos in via Domini instruendos ut, catechismi rudimentis praemuniti, posset etiam ingenio obtusiores perfrui beneficio absolutionis sacramentalis et mensae eucharisticae.

Hoc operariorum nostrorum vernantium ministerium, quo vividius historiae face colluceat, exigit quasdam explanationes propterea quod in supra decerptis paginis tannoianis opus est secernere narrationis nucleum Scalensem a commentis posterioribus. In primis quoad audientium numerum. Supponit namque P. Tannoia, et nos olim opinioni illius adhaesimus (47), convixisse in edita planitie S. Mariae « di Monte » agrestes cohortes, quae turmatim accurrebant ad missionarii instructiones avido ore potandas. Turma autem, hodierno nostro iudicio, numerice diluenda est, utpote quod grex ovinus atque vaccinus Scalensis, ut supra (nota 8) ex documentis accepimus, multiplicari nequit nec proinde inconsulto ultra unam alte-

(47) R. TELLERIA, *San Alfonso Maria de Ligorio*, I, Madrid 1950, 148. Illo iam tempore oculis pedibusque aream S. Mariae « di Monte » lustravimus, at non sufficienter vallem Tramontii: quam postmodum lentius percurrimus, calcando semitam Ravelli-Sambuco ac superando cacuminatum transitum (*il Passo*), quo vallis Tramontii cum altiplanitie Scalensi iungitur.

ramve duodecadem supputare opiliones armentariosque gregi pascendo addictos: duodecadem ex hypothesi augebis, si pastoribus Scalensibus adiungas eorum compares ex Lettere et Gragnano forsitan convenientes. His gregum custodibus cum addideris paucos selvifragos, lignorum nempe caesores ac carbonarios, habebis auditorum summam ordinariam (48).

Ordinariam dicimus, quia extraordinariam frequentiam substatere posse credimus fragmento tannoiano: mense scilicet maio vel iunio floruisset apud gentes finitimas consuetudo peregrinandi ad B.V.M. sanctuarium, ita ut an. 1730 densior fidelium concursus evenisset iisdem diebus ac S. Alfonsus ruricularum (*gente dispersa per quelle campagne*) corona stipatus fertur. Nullo hucusque documento suffragatam cernimus hanc hypothesim, licet a priori haud spernendam, quippe quod inter vallestres Tramontiates viget hodieque avitus mos conscendendi in regionis sacra delubra, quin ipsos ab ascensione deterreant plurimae itinerariae horae aut imperviae montium semitae (49). Porro praeter Tramontiates viantes per praerupta tres quattuorve horas, complissent hypotheticam peregrinationem incolae circumscriptionis Scalensis (Pontone, Minuto, Ravello, Sambuco) necnon montivagi altae planitiei habitatores (Pogerola, Agerola) aut accolae septentrionalis declivitatis (Orsano, Lettere, Gragnano, Pimonte). Sin aliter existimetur prorsus improbabilis quaevis peregrinatio, eo ipso imminui debet agmen convenientium, quale a P. Tannoia describitur.

Eadem critices lance repensare iuvat gradus culturae humanae ac instructionis religiosae personarum, quae ad sanctuarium conveniebant. Quibusdam S. Alfonsi biographis placuit asseverare pastorum Scalensium rationem vivendi parum disconvenisse a modo agendi pecudum, quas vigilanter pascebant. Indubitanter grandecebant ignorantia, at non certe grassiore quam alii incolae eiusdem coetus socialis ferebant: nec inter montes perpetim defixerant tentoria, sed periodice ad pabulandum greges constricti: quod si hac de causa cum substantis Scalae concivibus rumpebant ordinarium commercium civile ac religiosum, hoc trahebatur solummodo ad tempus et pro illis qui in proprias domos nequibant descendere: pro ceteris autem in monte vagantibus adesse praesto debebat confortans cappellani ministerium.

(48) Sunt qui asserant olim exstitisse, initio superno declivii Scalam respicientis, nucleum habitationum seu casarum ad usum saltem temporaneum familiarum: de quo nullum hodie comperimus vestigium.

(49) Nuper domenica secunda post Pentecosten obvias habuimus Tramontiates fidelium catervas, qui parochio aliove sacerdote duce descendebant ex edito sanctuario B.V.M. « dell'Avvocata » supra montes civitatis Maiori recondito. - Cfr *Spic. Hist.* 8 (1960) 393 ss.



Caeteroquin vix hodie concipimus quo iure Scalae civitas eiusque districtus laborasse praesumuntur ignorantia religiosa atque sacrorum ministrorum inopia. Ex coaevis etenim documentis conficimus tabellam publicam paroecialem, constantem nempe septem vel octo paroeciis (50), intra quarum ambitum agebant quinquaginta circiter sacerdotes (51), debebant autem 1500-2000 incolae (52). Quae quidem animarum sacerdotumque proportio, olim haud absona in regno neapolitano, minime impedit quominus futurus S. Alfonsi apostolatus inter Scalenses cives extollatur et muneretur publice tanquam necessarius ac beneficus. Sed de his redibit — Deo volente — sermo postquam absolvamus hodiernum de S. Maria « di Monte » commentarium.

5. - *S. Alfonsus de novo condendo Instituto secum deliberat.*

Contactus diuturni ac familiares inter S. Alfonsus et suos catechizatos pepererunt fructus salutare: prae primis in beneficium pastorum, pro quibus feriae zelantis apostoli mutatae sunt, ait P. Tannoia, in proficuum missionem. Sed pro missionario ipso obsignaverunt lapillo specifico tempus futurum. Enimvero quoties, labentibus annis, evocabat ille inter sui Instituti sodales cunabula primaeva Congregationis, toties menti ipsius subibat imago opilionum Scalensium: ex quibus, ultro in sermone procedens, pergebat ad ampliorem totius regni visionem, ubi messis animarum — praesertim rucolarum — erat plurima, pauci autem operarii in agro ad metendum prompti.

Ipsamet tunc aderat in agro seu in monte, rediturus tamen

(50) Ecce paroeciarum numerus ac tituli, quales pro annis 1730-1740 indicantur in foliis infra relatis et se ad invicem complementibus: a) « Parrocchia di S. Croce, unita alla arcipretura della Cattedrale »: quare ab aliis dicitur simpliciter paroecia ecclesiae cathedralis. - b) « Parrocchia di S. Giovanni dell'Acqua di Scala ». - c) « Parrocchia di S. Pietro a Castagna seu Campo Leone ». - d) « Parrocchia di S. Andrea di Panno ». - e) « Parrocchia di S. Stefania ». - f) « Parrocchia di S. Caterina, juspadronato della famiglia d'Afflito ». - g) « Parrocchia di S. Maria di Pontone ». - h) « Parrocchia dell'Annunziata di Minuto ». Adest etiam « paroecia Campidonici » (Campidoglio), probabiliter cum una ex praecedentibus « identificanda ». Cfr Arch. di Stato, Napoli, Catasto, v. 3967: Scala. Atti Preliminari. - Arch. dela Curia, Amalfi, Scalen., v. 19: paroecia Campidonici. - Arch. di S. Lorenzo (ex-Cattedrale), Lib. Defunct. Scal. Cathedralis (1702-1855). In hunc librum ecclesiae cathedralis confluebant Acta aliarum paroeciarum.

(51) Arch. del Municipio, Scala, Catasto an. 1740. Sine fol. In fine voluminis prostat elenchus nominativus, comprehendens 42 ecclesiasticos (canonicos, sacerdotes, tres diaconos) cum uniuscuiusque bonis. Caeteroquin cathedralis Capitulum an. 1720 constabat 16 dignitatibus et canonicis. Cfr O. GREGORIO, *Mons. Tommaso Falcoia*, Roma 1955, 135.

(52) Pro Scala simul et Ravello processu Datariae an. 1718 computat 350 domos (*fuochi*) et 3.000 animas; anno autem 1372 adsignat 500 domos, et 3.500 incolas. Arch. Vaticano, Proc. Datariae, v. 95, f. 146; v. 109, f. 55. Illa aetate, secus ac hodierna, Scala superabat Ravellum influxu oeconomico et politico, etsi episcopus Ravelli moraretur ratione palatii aptioris quam erat episcopium Scalense.

in urbem. Haec antinomia facta est illi mentis cordisque aculeus. Opinione nostra errant qui verbis testium materialibus freti considerant bubulcorum Scalensium ignorantiam et penuriam spiritualem tanquam unicam causam deliberationis a missionario in secessu protractae: a die namque an. 1724, quo inter sodales Missionum Apostolicarum legatione pro Christo fungebatur, quasi manibus contrectaverat haud multo dissimilem ignorantiam et catecheticam inopiam apud piscatores insulae Prochydae littorisve Posillipi atque inter aratores bovillosque custodes Felicis Campaniae. Porro non solum intra se recogitaverat, sed etiam foras revixerat historiam evangelicam: «Et circuibat Iesus omnes civitates et castella... praedicans evangelium regni... Videns autem turbas, misertus est eis, quia erant vexati et iacentes sicut oves non habentes pastorem. Tunc dicit discipulis suis: Messis quidem multa, operarii autem pauci. Rogate Dominum messis, ut mittat operarios in messem» (Matt., IX, 35-38).

Quibus divini Redemptoris dictis S. Alfonsus iustificavit post quattuor fere lustra suam Congregationem adolescentem (53), cuius exordium in mente sua plasmatum fuit hisce diebus prope B.M.V. «di Monte» effigiem. Sub illius praesidium caelesti lumine recreatus, non modo ipse misericordiâ deliquit erga Christi oves circum aedem vagantes, verum etiam celerius vibravit memoriâ operariorum, longe lateque in urbibus obdormientium. Abundabant profecto in neapolitana metropoli missionarii, at plerique extra moenia exire ac permanenter vivere recusabant, ruricolos in pagis dispersos evangelizaturi: quin immo, sodales inscripti confraternitatibus apostolicis dioecesanis enervabant salutiferos missionum effectus ex concomitantibus in plebe excolenda iniquationibus humanis, S. Alfonso apprimè notis ob hucusque ab eo praestitam collaborationem. Apud ipsos namque generatim desiderabantur maior vivendi austeritas, zelus cupiditatis orbis, concionum stylus egregie popularis, strictior unitas doctrinalis in rebus theologicis, asceticis et moralibus aliaque his similia ligamina, praeter altiora vitae communis et obedientiae canonicae reservata societati religiosae stabiliter erectae.

His hominum lacunis cumulabatur alia valde gravis, coalescens ex distantia, quae communiter separabat operariorum sedem urbanam a municipiis ruralibus vel montanis. Separatio geographica consequentiis praegnans, utpote qua ex defectu viarum aut facilis locomotionis impediabatur frequentior nuntii evangelici re-

---

(53) In eodem sensu ac iisdem fere verbis expressis an. 1748 S. Alfonsus in sua Relatione ad card. Spinelli. Cfr *Lettere di S.A.*, I, 155-156.

ditio in paroecias iam evangelizatas simulque e contra fraudabantur desideria christifidelium habendi sibi proximos sacros ministros, quorum ductu ad bonam frugen sese tempore missionis receperant.

Antithesis porro inter necessitates populi spirituales ac modum insufficientem eisdem subveniendi cruciavit his hebdomadibus S. Alfonsus eumque induxit ut secum deliberaret de nova phalange missionaria noviter struenda: nova, quatenus insereretur cohortibus apostolicis Neapoli ex antiqua traditione militantibus: noviter, quatenus instrueretur renovatis evangelizandi armis ac castra metaretur extra locorum moenia («Fuori de' paesi»), in dioecesis nodo viario atque in vicinitate agri, sacris excursionibus lustrandi. Deliberationes eo exitu urgentiores, quod caprarii aliique in catechesi participes rependerunt praeconem Christi aureo pauperum stipendio, id est, effusa cordium gratitudine: eumque tandem abeuntem enixe deprecati sunt, ut ex urbe neapolitana quantocius apud ipsos regrederetur, completurus operam regenerationis moralis illis hebdomadibus susceptae.

Pari igitur modo ac S. Ignatius de Loyola, qui ad ripam fluminis Cardoner concepit mente germinales Societatis Iesu formas easque mystica visione intus sacellum La Storta postmodum definitive plasmandas suscepit (54), S. Alfonsus in secessu S. Mariae «di Monte» adumbravit lineamenta novae suae Congregationis. Hac tamen differentia, quod ipse a quinquennio verbi missionarii sator inter pauperes, potuit ordinaria Dei gratia — visionum experite — praespiciere specialem vocationem superne sibi adsignatam: quam non solum «in nuce» seu in germine amplecti properavit, sed specificè constitutam fermento missionario. Huic iniectus fuit sanguis integer doctrinae asceticae, Verbo Incarnato per imitationem adhaerentis, quam assequi, sugere et in proprium sucum convertere valuit ex accessione providentiali ad monasterium Scalense SS. Conceptionis.

#### 6. - *Digitus Dei.*

Quot et quales hebdomadas egerit S. Alfonsus in eremitorio Scalensi pertingere valemus ex termino a quo et ad quem protracta est peregrinatio. Quoniam die 7 mensi maii an. 1730 clausam ille declaravit missionem in ecclesia neapolitana SS. Annuntiationis, repetere inde possumus initium excursionis amalphantanae: alterna-

(54) Cfr S. IGNACIO DE LOYOLA, *Obras completas*, ed. Larrañaga (BAC), Madrid 1947, 188: «A las márgenes del Cardoner, su primera idea del Instituto de la Compañía, que entrevisto ya en los ejercicios del *Reino de Cristo* y de las *Banderas*, pasó por su mente en aquella gran luz, al decir de Nadal, «como en sus razones y causas germinales». - Super visione habita intus La Storta, *Ibid.*, 503-512.

tim, quia die II mensis iunii, recurrente dominica infraoctava SS. Corporis Christi, Scalae concionatur ipse, plebi locali ac nobilium coetui ex suggestu acceptissimus, fundate concludimus vernaes in S. Maria «di Monte» ferias cessasse pridie magnae solemnitatis eucharisticae, scilicet feria quarta 7 iunii. Denique in Neapolim reditus festine evenit eadem die dominica post meridiem aut postridie summo mane, quandoquidem sub vesperum diei 12 interfuit Neapoli hebdomadariae sessioni Missionum Apostolicarum.

Brevis proinde fuit mora intra civitatis limites, at mire signata digito Dei, qui significasse videtur missionario suum beneplacitum duplici manifestatione: favore nempe Ordinarii loci atque initiali amicitia monasterii SS. Conceptionis. Errat iterum P. Tannoia, annis praedictis quod peregrinatio postferenda est ad an. 1732, dum sibi nunc proponit Rev. m. D. Antonium M. Santoro obvium factum S. Alfonso huicque dicentem suum ac populi desiderium exaudiendi proxima die dominica concionem eius eucharisticam. Equidem adhuc et ab anno 1718 praeerat dioecesi Rev. mus D. Nicolaus Guerriero (55), quem idem biographus antehac praenominat cuiusdam academiae theologiae Neapoli conditorem ac S. Alfonsi clerici in ea patronum (56). Si quae prius inter illos Neapoli cesserat amicitia, hanc solidavit Scalae haec nova animorum communicatio (57), statim aliis visitationibus adaugenda: unde tandem

(55) Quoniam Rev. mus D. Nicolaus Guerriero memoratur crebro a biographis alfonsianus, subnectimus breve vitae suae curriculum et fontes archivi hisce notis proximos. Porro natus erat an. 1668 in oppido Cammerosa, dioecesis Policastrensis: doctor in utroque penes universitatem neapolitanam functus est munere advocati in Curia neapolitana, mox advocati pauperum in Nuntiatura, inde Vicarii Apostolici in dioecesi Caputaquensi (Capaccio), demum iterum advocati in Nuntiatura: unde primis an. 1718 diebus assumptus est ad sedem Ravellensem et Scalensem regendam. Arch. Vat., Nuntiatura di Napoli, v. 156, an. 1718, f. 5, 9, 25, 27; v. 129, f. 181, 189; v. 153, f. 666 (29 dic. 17176: Vicario Apostolico di Capaccio). - Ibid., Proc. Consist., v. 107, an. 1718, f. 524: Ravellensis et Scalensis Vacasse asseritur ecclesia ab an. 1714 per translationem Rev. mi Perrimezzi in Oppidensem (Oppido). - Ibid., Proc. Datariae, v. 95, an. 1718, f. 146: Ravellensis et Scalensis («Scala e Ravello faranno da 350 fuochi e 3.000 anime»). - Ibid. Acta Camerae, v. 27, an. 1718, die 6 aprilis, f. 64-65. - Ibid., Lettere di particolari, v. 120, an. 1718, f. 29. Epistola autographa data Neapoli die 11 ian. 1718, qua gratias agit Em<sup>o</sup> Paolucci et nuntiat suum in Urbem adventum pro consecratione episcopali. - Item: Arch. di Stato, Salerno, Prot. Not., Scala, pacco 6713, Biagio Imperato, an. 1718, f. 68 (nominatio procuratoris), f. 69 (captatio possessionis), f. 70v. (Breve Clementis XI), f. 72 (supplicatio pro exequatur huiusque concessio).

(56) A. TANNONIA, *l. cit.*, 32: «Fatto ecclesiastico frequentava quelle [case] de' primi luminari del clero napolitano, ove accademia vi fosse di cose teologiche: e tra gli altri quella di D. Nicolò Guerriero, uomo molto illuminato e dotto, che fu poi vescovo di Scala e Ravello». Non postea fuit episcopus, ut asserit biographus, sed iam erat ab an. 1718, id est, sex annis prius quam S. Alfonsus militiae ecclesiasticae adscriberetur. Academiam autem, si quae in domo sua nata est, nequibat ex sua dioecesi efficaciter gubernare nec ad eam confovendam redire Neapolim nutu proprio contra prohibitionem S. Sedis.

(57) Hisce vernis hebdomadibus praesumitur adfuisse in sede Rev. mus Guerriero, qui die 20 aprilis an. 1730 «in palatio episcopali eiusdem civitatis», id est, Ravelli delegit

orta est benevolentia qua eximius Praesul acceptavit et probavit S. Alfonsi deliberationes circa praeconceptum Institutum missionarium. Angebant exemplarem antistitem, una cum his quaestionibus spiritualibus, aliae materiales, quae ipsum illis mensibus adegerunt ut de montanis Mensae castanetis decertaret Romae et Neapoli (58) contra Ravellenses municipes, ab eo plectendos censuris canonicis et locali interdicto: certamen pro ipso mortale, quia dum illud duos menses Neapoli prosequutus est (59), ibidem morti sexagenarius occubuit mense aprili (60) an. 1732 quin benedictionem suam impertiri valuisset novo Instituto alfonsiano iam iam exordienti.

Initialis supra insinuata amicitia S. Alfonsi cum monasterio SS. Conceptionis ex eo prosiluit, quod fervens missionarius post conclamata (61) in cathedrali Scalensi eucharisticam concionem habuit aliam asceticam ad sanctimoniales, quas inter dignovit Ven. Mariam Caelestem Crostarosa, deinceps per triennium innectendam foundationi duplicis Instituti SS. Salvatoris. Primam hanc monasterio aditionem subsequuta sunt mense septembri diuturna colloquia occasione novendialis SS. Crucifixi in cathedrali ecclesia celebrati atque intervallo exercitiorum spiritualium, quorum fructus sese vicissim refudit in animam S. Alfonsi inhiantis sibi adstringere moniales Scalenses orantes tanquam cooperatrices spirituales in molimine suo specificè missionario (62).

### 7. - *Super S. Mariae « di Monte » epilogus.*

A scopo hodie nobis praefixo exsulat immorari in annalibus foundationis Scalensis, inauguratae die 9 novembris an. 1732. Subii-

---

suum procuratorem D. Gabrielem Pacelli Neapoli acturum. Arch. di Stato, Salerno, Prot. Not., pacco 4666, Luigi d'Amato (Ravellensis), an. 1730, f. 91v.

(58) Arch. Vaticano, Vescovi, v. 155, f. 129. Epistola autographa, data die 6 martii an. 1731, qua implorat S. Sedis praesidium ut per Nuntium neapolitanum sibi benevolentiam proregis et delegati regiae iurisdictionis acquirat.

(59) Sub finem huius anni 1731 nuntius neapolitanus communicat card. Banchieri quod ex 24 episcopis antehac extra residentiam morantibus Neapoli, remanent 10, quos inter « Mons. Vesc. di Scala e Ravello per interessi della sua Chiesa ». Arch. Vaticano, Nunz. Napoli, v. 182, f. 542.

(60) In Processu Consistoriali sui successoris legimus: « Vacano le dette chiese per la morte di Mons. Nicolò Guerriero... seguita nella città di Napoli nel mese di aprile... ». Arch. Vaticano, Proc. Consist., v. 118, an. 1732, f. 446: Ravellensis et Scalensis. - Defuncti Praesulis modestiam et exemplarem paupertatem nobis mandavit inventarium suorum bonorum confectum in palatio episcopali Ravellensi die 21 aprilis eiusdem anni. Arch. di Stato, Salerno, Prot. Not., Imperato Nicola, an. 1732, april. 21.

(61) Cfr A. TANNOLA, *l. cit.*, 63: « Tutto l'uditorio non solo pianse, ma prorompe si vide in singhiozzi e schiamazzi: e tali, che anche l'intesero nel vicino Conservatorio delle monache del Salvatore ».

(62) *Lettere di S.A.*, I, 1-8.

cius dumtaxat S. Alfonsum eiusque primos sodales perrexisse opus evangelizationis inter pastores montanos: eo maximum quod incipiente novo Instituto sese transferre Scalam voluit dioecesis novellus Praesul Rev.mus D. Antonius M. Santoro (63) et quod, saltem a mense maii eiusdem anni, cappellariam S. Mariae «di Monte» regebat (*Doc. V*) Rev.dus Stephanus Cappuccio, inter cappellanos vere insignis, utpote qui die 4 ianuarii an. 1767, etiamsi canonicus, adhuc possidet cappellariam, quam post tres dies cessisse videtur Rev.do D. Andrea Cappuccio, donec an. 1771 compareret beneficiatus Rev.dus D. Salvator Cappuccio (*Doc. VI*).

S. Alfonsus, quem summopere delectabant saxa Scalensia (64), praesumitur non semel revidisse pastores montanos, dum annis 1332-1733 constitit in civitate roborans primam foundationem. Absens postmodum an. 1734 in secunda Instituti domo seu Villa Liberi notitias libenter excipiebat apostolatus, quem inter opiliones S. Mariae «di Monte» exercuit mense iulio Ven. D. Ianuarius Sarnelli, Congregationis decus (65). Similiter anno sequenti gavisus est de proposito, quod fovebat D. Iosephus Panza, scilicet peregrinandi in sanctuarium mense augusto cum quibusdam amicis amalphanis (66) ibique obeundi consueta ministeria in beneficium animarum.

Interea germinandas curaverat sementes in corde suo factas ad pedes B.V.M. «di Monte». Iteratae declarationes testium in processu beatificationis commonstrant quod, dum ille labentibus annis cunabula Instituto sui retrospectiebat mente, huic occurrebant feriae an. 1730 tanquam primum stadium agonale novae Congregatio-

---

(63) Libro de' Parlamenti, l. cit., f. 153v. - « [Otto dicembre 1732] Mgr. Santoro ha determinato venire ad habitare in questa città, e perché il palazzo Vescovile l'anno passati per essere cascato si diedero le pietre al nuovo monistero... l'Ill.mo Vescovo [vuole] accomodare l'edificio di casa della Mensa, sito nel luogo dello Campo ». Ad restaurationem donarunt municipes ducatus 200. Remittimus in aliam occasionem, ne fiamus prolixiores, notitias super Revmo Santoro, cuius auctoritas et participatio in condendo Instituto alfonsiano dignae sunt, quae recolantur.

(64) Ad illum rescripsit Rev.mus Falcoia die 3 iunii an. 1733: « Mi consola il sentire che tanto vi piacciono le pietre di Scala ». *Analecta* 11 (1932) 169. Ceteroquin fruitur Scala prospectu circum undique pulcherrimo, quo artium (poëseos, picturae) periti scandinavii conveniunt mensibus aestivis, fortasse memores strophae:

« Sic inter cineres veteranaeque rudera plenum

Delitiis pandit florida Scala penu ». M. CAMERA, *Istoria della città e costiera amalfitana*, Napoli 1836, 301.

(65) Die 11 iulii an. 1734 idem Rev.mus Falcoia ad S. Alfonsum in Villa Liberi comorantem: « D. Gennaro [Sarnelli] sta per questo mese su la Madonna de' Monti, ed ivi fa gran giovamento a quei pastori ed ad altra gente che vi concorre: tanto più, che hanno ottenuto di conservarvisi il SS. Sacramento, e stà facendo altre fatighe ». *Ibid.*, 362.

(66) Die 19 augusti an. 1735 Ven. P. Caesar Sportelli ex Scala ad S. Alfonsum adhuc in Villa Liberi habitantem: « Esso Sig. D. Giuseppe Panza... dice voler andare assieme con certi di Amalfi in S. Maria de' Monti ». *Epistolae Ven. Caesaris Sportelli*, Roma 1937, 20.

nis (67). Quoad naturam et amplitudinem deliberationum manet opinandi libertas (68). Unum negabit nemo: quod vexillo suo missionario ex tunc appositum fuit nomen divinae Corredentricis quae, diversis mox advocacionibus elata (69), facta est apostolatus alfonsiani Socia, Auxiliatrix et Magistra.

## DOCUMENTA

## I

*Rev. dus D. Laurentius Nastaro deligitur an. 1708 cappellanus S. Mariae di Monte a Loci Pii patrono D. Philippo Surrentino*

Ravello, Arch. Parr. (ex-Cattedrale), Civilia, 1701-1782. - Copia.

All'Ill.mo Mons.r Vesc<sup>o</sup> della città di Scala e Ravello.

Il Dr. Filippo Sorrentino espone a V.S. Ill.ma come tenendo nominato per suo cappellano della Ven.le Chiesa di S.ta M<sup>a</sup> di Monte, sita sopra la montagna di Scala, il R.do D. Scipione Pizzoferro in virtù della fondazione di d<sup>a</sup> cappellania con il jus nominandi seu praesentandi concesso dalli Predecessori di V.S. Ill.ma al quondam Rationale della Regia Camera Scipione Sorrentino, suo avo, per se, suoi eredi e successori da primogenito in primogenito in perpetuum amovibile d<sup>o</sup> cappellano ad nutum di d<sup>o</sup> fondatore e suoi successori, senza potervi inserire né la Corte Vescovile di V.S. Ill.ma né la R.da Fabrica Apostolica, come appare dall'instrumento della fondazione di d<sup>a</sup> cappellania e decreto di assenso di d<sup>a</sup> Corte Vescovile, alli quali in omnibus s'habbia relazione, et havendo di presente d<sup>o</sup> Rev.do D. Scipione Pizzoferro rinunciato d<sup>a</sup> cappellania per causa di sue indisposizioni: che perciò in virtù di d<sup>a</sup> facoltà et jus di nominare d<sup>o</sup> cappellano, che all'oratore spetta come erede ex primogenito di d<sup>o</sup> quondam Rationale Scipione, nomina per cappellano di d<sup>a</sup> D. Lorenzo Nastaro con obligo di dovere d<sup>o</sup> D. Lorenzo non soltanto assistere continuamente di giorno et di notte in d<sup>a</sup> chiesa di S.ta Maria di Monte sopra la montagna della città di Scala et anche nella medesima chiesa celebrare quattro messe la settimana secondo l'intenzione del fù d<sup>o</sup> quondam Rationale Scipione fondatore, ma ancora debba osservare ad unguem ogn'altra cosa contenuta nell'instrumento di d<sup>a</sup> fondazione con essere il medesimo D. Lorenzo cappellano ut supra amovibile ad nutum del medesimo oratore, giusta d<sup>o</sup> instramento di d<sup>a</sup> fondazione.

Supplica intanto V.S. Ill.ma di ammettere d<sup>o</sup> D. Lorenzo per cappellano dell'oratore in d<sup>a</sup> chiesa di S<sup>a</sup> M<sup>a</sup> di Monte con le prerogative et ogni altro

(67) Hos praecipuos testes exhibet M. DE MEULEMEESTER, *Origines de la Congrégation du Très Saint-Rédempteur*, Louvain 1953, 22-24.

(68) Ad minimum reducere videtur has deliberationes praefatus De Meulemeester (*Ibid.*, 24), haud satis perpendens adiuncta geographica, personalia atque historica.

(69) Cf. *Spic. Hist.* 3 (1955) 125-152.

jus che hanno goduto i predecessori cappellani nominati dall'oratore e suoi antecessori con li medesimi pesi et amovibile ad nutum ut sup<sup>a</sup>, con darsele il possesso di d<sup>a</sup> cappellania, acciò la d<sup>a</sup> chiesa sia servita et non resti in abbandono: è giusto e lo riceverà a grazia singolarissima.

Io D. Filippo Sorrentino nomino ut supra.

[*Decretum Curiae:*] Per R.num D.num Gen.lem Vicarius Scalen. viso supra dicto supplici libello fuit provisum et decretum quod R.dus Laurentius Nastarus immittatur in possessionem supra enunciatae cappellaniae cum conditionibus in d<sup>o</sup> memoriali expressis, et proinde committimus notario in Actibus Rev. Curiae adscripto quod illum immittat in veram, realem et pacificam possessionem dictae cappellaniae cum omnibus honoribus et oneribus solitis et consuetis: et ita...

Datum Scalis in Episcopali Curia hac die 19 m. julij 1708.

Andreas Sassus, Vicarius Gen.lis Scalen.  
De Augustino [cancellarius] pro Curia.

[*Fides actus possessionis:*] Die 19 m. julij 1708 in d<sup>a</sup> montanea civitatis Scalensis atque in d<sup>a</sup> Ven.li ecclesia Rev.dus Laurentius Nastaro ante altare majus genuflexus cepit possessionem in vigore supra dicti decreti dictae cappellaniae ornando et desornando praefatum altare et praesentibus protestibus Rev.do D. Nicolao Amendola, Rev.do D. Domenico Afeltro, Carmine Imperato civitatis Scalem. et aliis, et per me D. Carolum Manso fuit stipulatus actus dictae possessionis pacifice et quiete. .

[*Ad folii dorsum:*] A dì 19 luglio 1708 poss. pigliata da D. Lorenzo Nastaro della capp.nia di S<sup>a</sup> M<sup>a</sup> di Monte.

## II

*Rev.dus D. Carmine Sanmarco declaratur an. 1726 cappellanus S. Mariae « di Monte » ac munus retinet quo tempore Scalae vixit S. Alfonsus.*

Ravello, Arch. Parr., 1. cit. - Originale.

[*Ad folii dorsum:*] Bulla del R.D. Carmine Sanmarco per S. Maria di Monte.

Nicolaus Guerriero U.I. Dr., Sac. Theol. Prof., Dei et Ap.licae Sedis gratia Episcopus Scalen. et Ravellen., eidem Sanctae Sedi immediate subjectus.

Dilecto Nobis in Christo Rev. D. Carmino Sanmarco, sacerdoti hujus civitatis Ravelli, salutem in D.no, qui est vera salus. Vitae ac morum laudabilisque virtutis tuae [exempla] Nos inducunt ut ad gratias tibi redamur liberales. Cumque Nobis fuerit expositum:

All'III.mo Mons.r Vesc.vo di Scala e Ravello. Il Dr. Filippo Sorrentino espone a V.S. Ill.mo come per l'età avanzata e continue infermità del Rev.do D. Gaetano Manzo, che tiene nominato per cappellano della Ven.le



chiesa di S. Maria di Monte sita sopra la montagna della città di Scala, il medesimo si è reso inabile a poter continuare la carica sudetta; per il che l'ha rimosso da detta cappellania: e dovendosi da esso Oratore nominare altro cappellano in virtù del jus patronato, che fu concesso al quondam Razionale della Regia Camera Scipione Surrentino suo avo, e suoi discendenti primogeniti: che perciò nomina per cappellano di d<sup>a</sup> Ven. Chiesa di Maria di Monte il Rev.do D. Carmine Sanmarco in luogo di d<sup>o</sup> Rev.do D. Gaetano, con l'obbligo al d<sup>o</sup> D. Carmine non solo di celebrare quattro messe la settimana secondo fù l'intenzione del d<sup>o</sup> Razional Scipione fondatore di d<sup>a</sup> Ven.le Chiesa, ma ancora di continuamente abitare di giorno e di notte in d<sup>a</sup> Ven.le Chiesa: il qual cappellano sia amovibile ad nutum dell'Oratore medesimo a tenore delle espresse condizioni apposte nell'istromento di d<sup>a</sup> fundazione, al quale in omnibus s'habbia relazione. Supplica in tanto V.S. Ill.ma accettare la nomina sud<sup>a</sup> ed ordinare che lo stesso D. Carmine possa esercitare la carica in d<sup>a</sup> chiesa, e l'avrà a grazia singularissima.

Io Dr. Filippo Surrentino nomino ut supra.  
In calce cujus decrevimus ut sequitur:

Iesus. - Visis expositis ac stante notoria et perpetua inhabilitate Rev. D. Cajetani Manso ad celebrandum et inserviendum ecclesiae S. Mariae de Monte, Ill.mus et Rev.mus D.nus Ep.us praesentationem admisit et mandavit expedire Litteras Bullares in personam R.di D. Carmini Sanmarco, sacerdotis Ravellen., prout praesenti decreto.

Datum Ravelli ex Palatio Episcopali die ultima augusti 1726.

Nicolaus Ep.us Scalen. et Ravellen.  
Pisanus canc.rus

Ideo vigore praesentium Te supra dictum R.D. Carminum nominatum de dicta cappellania investimus, et cappellanum deputamus cum omnibus juribus, emolumentis caeterisque obventionibus solitis et consuetis praestari aliis cappellanis S. Mariae de Monte civitatis Scalen. - Mandamus omnibus ad quos spectat ut Te in talem recognoscant, tractent et reputent. Committentes nostro Gen.li Vicario Scalen. U.I.D. D. Angelo can. Criscuolo ut in possessionem dictae Cappellaniae veram et realem inducat, et inductum manuteneat, amoto quovis illicito detentore et signanter dicto D. Cajetano ex causis supra enunciatis.

Datum Ravelli ex nostro Episcopo die prima septembris 1726.

[*Manu propria*:] Nic. Ep.us Scalen. et Ravellen.  
Pro D. Carmino San Marco

*Adest sigillum.*

[*Ad folii dorsum*:] Fidem facio ego D. Carolus Mansi Ravellen., publicus Notarius in Arch. Rom. Curiae adscriptus, qualiter sub die secunda mensis septembris millesimo septingentesimo vigesimo sexto in civitate Scalensi, et proprie in Ven.li Ecclesia S. ae Mariae de Monte sistente in montanea dictae civitatis; ibidem dum essemus intus eandem ecclesiam

Per-III.mus et Rev.mus U.J.D.D. Angelus Criscuolo Vic. Gen. dictae civitatis retro scriptam Bullam posuit et immisit in veram, realem et corporalem possessionem retroscriptae cappellaniae retroscriptum Rev. D. Carminum Sanmarco: qui genuflexus ante altare majus ecclesiae oravit aliquantum, postea ornando et exornando praefatum altare aliosque actus faciendo denotantia[sic] verae possessionis cepit et apprehendit veram, realem, pacificam, corporalem et expeditam possessionem retroscriptae cappellaniae sibi collatae, nemine penitus contradicente nec discrepante. Prout haec et alia patent ex instrumento possessionis praesente rogato manu mea. Praesentibus pro testibus Ad.m RR. D. Petro Donato, D. Dominico Afeldro, D. Joachino Romano, D. Josepho Paulillo et aliis: et ad fidem sigilli rogatus.

C. Mansi

### III

*Cappellanus R.D. Carminus Sanmarco defertur ad Episcopi tribunal anno 1737*

Ravello, Arch. Parr., t. cit., 1737. - Originale.

[*Ad folii dorsum:*] Ravelli 1737. Acta civilia pro Ven.li Eccl<sup>a</sup> S.ae Mariae de Monte ad R.dum Carminum Sanmarco civit. Ravelli.

Ill.mo e R.mo Signore

Il Tesoriero della Ven.le Chiesa di S. Maria di Monte della città di Scala, umilissimo Oratore espone a V.S. Ill.ma come il R.D. Carmine San Marco della città di Ravello, olim cappellano di d<sup>a</sup> chiesa, per li danni causati nella medesima coll'incendio accadutovi per sua colpa e per la mancanza di molti mobili della stessa a lui consegnati, si convenne col Tesoriero di quel tempo, e si obligò a pagare ad essa chiesa ducati ottanta cinque; dopo di che essendosene andato ad abitare fuori di questa diocesi, non si è curato più sodisfare li sudetti ducati ottanta cinque, benché più volte richiestone. Ricorre impertanto l'Oratore a V.S. Ill.ma ed umilmente la supplica degnarsi ordinare all' d<sup>o</sup> D. Carmine, che paghi in beneficio della chiesa sud<sup>a</sup> gli accennati ducati ottanta cinque, e frattanto per sicurezza del giudizio sequestrare li legnami di una selva e bosco del medesimo, posti nel distretto della città di Ravello, che per sfuggire tal pagamento con tutta fretta fa tagliare e trasportarne: e l'avrà a grazia, ut Deus...

Die 7 aprilis 1737 Ravelli in Ep.li Curia. Per R.mum Gen.lem Vicarium Ravellen. viso suprascripto supplici libello provisum et decretum est quod suprascriptus R.D. Carminus Sanmarco in biduo solvat petitos ducatos octuaginta quinque in beneficium supra dictae Eccl.ae S. Mariae de Monte Scalen. et interim pro assicuratione judicij fiat sequestrum super lignaminibus sylvae et nemoris eodem supplici libello enunciatorum. Verum... et ita haec sunt.

Nicolaus Prim<sup>a</sup> de Fusco Vic. G.lis  
E. Pisani cancellarius

[*Ad folii oram:*] Die decima m. aprilis 1737 Ravelli in Ep.li Curia Franciscus Conte cursor ordinarius retulit mihi infra scripto cum juramento

se supra dicto die affixisse sequestrum in sylva in actis deducta, sita in pertinentiis dictae civitatis, in loco ubi dicitur « All'acqua di Scala », modo et forma sibi commissis: praesentibus pro testibus Carolo et Francisco Oliva civit. Scalen.

Eustachius can. Pisanus cancellarius ex relatione dicti cursoris scribere nescii.

[*Item ad oram sequitur:*] Die undecima aprilis 1737 Ravelli in Ep.li Curia praesentata est et compilata ad fidem. Pisanus Cancellarius.

Nella Reverenda Corte Vescovile della città di Ravello comparisce Nicola d'Amato, del quondam Matteo della città di Minori e dice come... viene danneggiato dal sequestro ». Promittit igitur depositum 40 duc. facturum, quatenus summa pecuniae pertinebat ad R.D. Carminum.

[*Item adnexum:*] Die 11 aprilis 1737. Actus a D. Nicolao d'Amato prolatus, quo constat R.D. Carminum Sanmarco eiusque fratrem Nicolaum inivisse Neapoli pactum cum praedicto Nicolao d'Amato, ut is sibi acquireret « tutti li legnami castagnoli selvaggi di una selva, che possedono in comuni et indiviso nella città di Ravello nel luogo detto l'acqua di Scala, da togliersi il prossimo venturo mese di marzo ».

[*Item anexum:*] Die 11 aprilis 1737. Emptores lignorum sese obligant ad depositum 40 duc., « porzione spettante al R.do D. Carmine ».

[*Folium adnexum:*] Copia. Tesoriero di S. Maria di Monte.

Possiede una Selva, ove si dice la piana, confinante il vallone, monistero del SS.mo Redentore e monistero di S. Cataldo, sopra la quale tiene il peso d'annui carlini quattro, che corrisponde per censo alla Parrochiale di S. Pietro a Castagna, stimato per annui carlini ventidue . . . . .	2,20
Di più dal Sig.r D. Emmanuele d'Afflitto per capitale di carlini cento, annui carlini . . . . .	5
Di più dal Sig.r D. Cirillo Sasso per cento annui carlini due . . . . .	0,20
Di più dal Sig.r D. Andrea Falcone per capitali di ducati settanta due annui carlini trenta sei . . . . .	3,60

#### PESI

Alla Ven.le Chiesa parr.le di S. Pietro a Castagna per censo sopra la d <sup>a</sup> Selva carlini quattro . . . . .	0,40
Per il giornale mantenimento della lampada ducati nove . . . . .	9
In tutto sono annui ducati . . . . .	9,40
Introito della Chiesa annui ducati . . . . .	11
Pesi che porta annui ducati . . . . .	9,40
Avanzano in ogni anno ducati . . . . .	1,60

## IV

*Aliae notitiae super S. M<sup>a</sup> di Monte, extractae ex Regestis  
pro vectigalibus constituendis (Catasto).*

## A

Scala, Arch. Munic., Catasto an. 1742, Sine fol. - Sub finem.

La Ven.le Ciesa di D. Maria di Monte, sita nella Montagna di questa città, possiede una selva castagnola, sita alla Piana, giusta li beni del Ven.le monistero del SS.mo Salvatore, ed il Vallone, stimata la rendita per annui carlini 22 . . . . . once 7,10

Possiede annui duc. cinque e tarì uno che esigge dal Sig. Emmanuele d'Afflitto e il Sig. Tomaso Sasso. sono . . . . . once 17,10  
24,20

## PESI da dedursi

Tiene il peso d'annui carlini quattro di censo sopra la selva, che corrisponde alla Ven.le Ciesa di S. Pietro a Castagna . . . . . 1,10

Tiene il peso di mantenere quotidianamente la lampada nella sud<sup>a</sup> chiesa, facendovi il più che vi bisogna di elemosina.

Quali annue rendite si rilasciano per li suddetti pesi.

## B

Scala, Ibid., Catasto an. 1753.

fol. 277. - Cappella di S. Nicola drento [*sic*] la chiesa di S. Maria di Monte, della quale n'è beneficiato D. Salvatore della Mura, a titolo di suo patrimonio. Esigge annui doc. quattro per censo del R.D. Aniello Afeldro.

Sono . . . . . once 13,10

Pesi annui carlini trentasei per altrettante messe. Sono . . . . . once 12

Dedotti i pesi restano . . . . . once 1,10

fol. 292. - Tesoriere di S. Maria di Monte.

Possiede una selva, ove si dice la Piana, confinante il Vallone, monistero del SS. Redentore e monistero di S. Cataldo, sopra la quale tiene il peso d'annui carlini quattro, che corrisponde per censo alla parr.le di S. Pietro a Castagna, stimata per annui carlini 22. E sono . . . . . once 7,10

Di più annui doc. cinque per capitale di doc. cento dal

Sig. D. Emmanuele d'Afflitto. Sono . . . . . once 16,10

Di più annui carlini due per censo da D. Cirillo Sasso.

## V

*Cappellano Rev.do D. Stephano Cappuccio conceditur licentia  
seminandi agellos an. 1732.*

Libro de' Parlamenti, 1. cit., f. 148.

Die 8 maji 1732... Di più si è da tutti concluso parimente e nemine discrepanate che sia lecito al R. Sig. D. Stefano Cappuccio, cappellano della

Ven.le chiesa di S. Maria di Monte di poter seminare e far seminare detta Montagna ò a fuoco ò a mantriato due tomola di grano.

## VI

*Fugaces adnotationes archivales super S. Maria de Monte in secunda parte saec. XVIII.*

Arch. di Stato, Salerno, Protocolli Notarili, v. 6742, Not. Franciscus M<sup>a</sup> Verone, an. 1761,

fol. 12v-17. - Die 11 januarij 1767. In civitate Scalarum... D. Andrea Amodio, can<sup>o</sup> del Capitolo, ed i suoi fratelli...; dal'altra parte il R.do Sig. D. Stefano Cappuccio, can<sup>o</sup> anche del Capitolo e Cappellano e Beneficiato della cappellania e beneficio eretta dal fù Sig. D. Scipione Sorrentino nella Ven. Chiesa di S. Maria de' Monti. Prolixum instrumentum acquisitionis nomine cappellaniae.

fol. 4v. - Die 7 januarij 1767. - Retrovenditio et quietatio pro cappellano D. Andrea Cappuccio: facta a D. Stephano Cappuccio.

fol. 18. - Die 4 januarii 1767. Cessio jurium pro cappellano et beneficiato S. Mariae de Monte D. Stephano Cappuccio: facta a fratribus Lignola.

Ibidem. v. 6744, Not. D. Franciscus M<sup>a</sup> Verone, an. 1771.

fol. 6v. - Die 2 ianuarii 1771. Emptio jurium pro cappellano et beneficiato S. Mariae de Monte. Il R. D. Salvatore Cappuccio, sacerdote secolare della città di Scala..., cappellano e beneficiato della cappellania e beneficio eretta dal fu D. Scipione Sorrentino nella Ven. Chiesa di S. Maria de' Monti. - Emptio fit nomine cappellaniae Ravelli et computatur annuis duc. 15.

foll. 116-121. - Die 4 aprilis 1771. Ravelli in Ep.li Palatio... Costituti l'Ill.mo Michele Tafuri Vescovo, D. Antonio Campanile primicerio e D. Michele Gambardella... ricevono dalli mag.ci Francesco, Raffaele e Venanzio Mansi ducati 162, girati al R.do Cappellano e Beneficiato di S. Maria de' Monti. Prolixa historia de praestitis pecuniariis.

fol. 121-124. - Eodem die 4 aprilis 1771. Cessio jurium pro Cappellania et Beneficio S. Mariae de Monte. Pergit et iterat relationem de cessionibus pecuniariis. Prae se ferunt haec instrumenta momentum reddituum, quibus tunc temporis fruebatur sacellum montanum S. Mariae de Monte.